



18. august 2017

UKA 2017/59

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Tungaviusumik inatsisip - aamma isumaqatigiissusiortarnermut sinaakkutissat Kalaallit Nunaannut atuuttut sinaakkutaasa iluanni Pisortat ingerlatsineranni suliassat sularineqartarnerat pillugu Inatsisartut inatsisaanni nr. 8-mi, 13. juni 1994-imeersumi § 28-p allannguutissaanik siunnersuuteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut tassani inatsisitigut periarfissaalersinniarlugu pisortat ingerlatsiviini nuna tamakkerlugu paasissutissanik katersivimmik pilersitsisoqarsinnaanissaa, allattugaatik suliallu meeqqanut sumiginnakkanut tunngasut politiinit, inunnik isumaginnittunit peqqinnissaqarfimmit, kommuninit allanilu oqartussaaffinnit susassaqartunit, taakkulu ataanni sullivinnit takusinnaanngorlugu.

(Inatsisartunut ilaasortaq Randi Vestergaard Evaldsen, Demokraatit)

Tungavilersuut

Meerartagut siunissaraangut. Aamma qujanartumik paasinarpoq nunatsinni meeqqat amerlanerpaartaat pitsaasumik toqqissisimasumillu meeraasut angajoqqaaminnit asaneqarlutik isumassorneqarlutillu. Tamanna nuannaarutigisariaqarparput.

Paarlattuanillu kannngusuutigisariaqarparput nunatsinni meerarpassuit ikinnerussuteqartut toqqissisimananngitsumik meeraammata ilaatigut persuttarneqartarlutik kinguaassiutitigullu kannngusaattuliorfigineqartarlutik. Tamumani annerpaamik akisussaapput soorunami angajoqqaat. Allatut ajornartumik isiginerusariaqalerparput meerartaarnerup suut nassatarisarnerai aamma angajoqqaat qitornamik meeraalluarnissaat kingornalu inuulluarnissaat qularnaarumallugu sunik akisussaaffeqalertarnersut.

Taamatulli oqareerlunga oqaatigisariaqarpara inuiaqatigiittut annertuumik akisussaaffeqaratta meeqqanut angajoqqaaminnik sumiginnarneqartartunut aamma tassani inunnik isumaginninnerup iluani nakkutilliinermut nalunaarusiat ajoraluartumik takutippaat inuiaqatigiittut nunatullu suliassagut iluamik isumagisinnaanngikkigut.

Meeqqat amerlavallaat angajoqqaaminnit sumiginnarneqartarput ingerlatiinnarlugulu aamma pisortanit. Tamanna kanngunaqaq. Naalakkersuisut kommunillu peqatigiillutik piaarnerpaamik tamatuma aaqqiivigineqarnissaa sulissutigisariaqarpaat.



Demokraatini tamanna tunngavigalugu siunnersuutigarpur inatsisitigut tunngavissaqalernissaq paasissutissanik sunilluunniit katersuiviliortoqarnissaanut, oqartussaaffinnit tamanit atorneqarsinnaasussamik tamatumani qularnaarumallugu, oqartussaaffiit susassaqartut pisariitsumik qularnaatsumillu meeqqat sumiginnakkat pillugit sulianut atatillugu paasissutissanik aallersinnaalernissaat.

Tassunga atatillugu soorunami pingaaruteqarpoq innuttaasut inatsisitigut illersorneqarnissaasa ataqpineqarnissaat, taamaattumik paasissutissat allallu inunnut tunngalluinnartut suliarineqartariaqarput tatigeqatigiinneq tunngavigalugu.

§ 37 naapertorlugu apeqquteqaammut nor 2017-161-mut akissummi atuarneqarsinnaavoq pisortat ingerlatsiviini assigiinngitsuni naliginnaasumik paasissutissanik paarlaasseqatigiittarneq - assersuutigalugu ingerlatsiviit assigiinngitsut paasissutissanik katersivii eqqarsaatigalugit - nalilerneqarpoq Pisortat ingerlatsineranni suliassat suliarineqartarnerat pillugu Inatsisartut inatsisaat nr. 8, 13. juni 1994-imeersoq unioqqutinneqarsimasoq. Inatsimmi tassani § 28-mi aalajangersarneqarpoq ingerlatsiviit akornanni paasissutissanik inunnut tunngalluinnuqqissaartunik qanoq paarlaasseqatigiittoqartassanersoq. Inatsimmi tassani takuneqarsinnaavoq pisariaqartoq inuit ataasiakkaat aalajangiisarnissaat tamatigut, ingerlatsiviit akornanni paasissutissanik paarlaasseqatigiittoqassatillugu.

Demokraatini isumaqarpugut tassunga tunngatillugu meeqqap isumagineqarnissaa pingaarnerpaasoq. Taamaattumik pisariaqarpoq inatsisip allanngortinneqarnissaa periarfissaalersillugu ingerlatsiviit assigiinngitsut akornanni aamma nuna tamakkerlugu paasissutissanik katersivimmik peqalernissaa taamaallaat meeqqanut sumiginnakkanut suliat eqqarsaatigalugit. Tamanna pissaaq meeqqat sumiginnarneqartartut ikiorneqartarnissaat illersorneqartarnissaallu pillugu.

Nuna tamakkerlugu paasissutissanik katersivimmik peqalernissamut siunnersuut kissaatigineqartutut akuerineqarpat taava pisortat meeqqat sumiginnakkat pillugit allattugaatinik pisariitsumik sukkaasumillu pissarsinnaalissapput, suliat sukkanerusumik suliarineqarsinnaalersillugit. Paasissutissat tamarmik soorunami pisortanit suliarineqartassapput paarilluaqqissaarlugit.

Tamatuma saniatigut pingaaruteqarpoq pisortat isumagisassammassuk sussuteqanngitsut paasissutissanik katersivinniit peerneqartarnissaat. Assersuutigalugu nalunaarut tunngavissaqanngitsutut nalilerneqarpat paasissutissanut katersivimmut paasissutissat allattugaatillu ilineqareernerisa kingorna, taava innuttaasup inatsisitigut illersorneqarnissaanut pingaaruteqarpoq taakku paasissutissanik katersivimmiit peeqqinneqarnissaat. Aammali suliassiissutigineqartoq paasineqarpat tunngavissaqanngitsoq taava assigiinngitsut ingerlatsiviit paasissutissanik katersuiviviat ikiuussinnaassaaq sukkanerusumik sulisoqarnissaanut



tamatumanilu aamma innuttaasoq iluaquserneqartussaassaaq.

Qilanaarpugut partiit allat saqqummiussassaannut taamatullu Naalakkersuisut akissuteqarnissaannut.

Aningaasatigut allaffissornikkullu pisortanut kingunerusussat

Aningaasatigut allaffissornikkullu pisortanut tamanna kinguneqassaaq. Inatsisissamut siunnersuusiorneq sivisunerpaamik ilinniagartuup ukiup sisamararterutaani akissarsiaanit, tassa 125.000 koruuninik annertunerussagatinneqanngilaq. Tamatuma saniatigut paasissutissanik katersuivimik pilersitsineq ingerlatsinerlu aningaasartuutitaqassapput. Aningaasartuutit taakku annertussusissaat ilisimaneqanngilaq. Allaffissorneq eqqarsaatigalugu paasissutissat immersuisuusassapput/nuterterisuusassapput pisortat allaffeqarfiini sulisut. Tagginneqarporli tamatumani suliaqartut amerlasoorsuunnginnissaat, allattugaatit allallu assigusut pinngitsooratik nalunaarsorneqartussaammata.

Aningaasatigut allaffissornikkullu sullivinnut namminersortunut kingunissai.

Soqanngilaq

Aningaasatigut allaffissornikkullu innuttaasunut kingunissai

Soqanngilaq.